

Tafsiira Suuratu As-Sajdah-Kutaa 4

Description

Rabbiin (subhaanahu) osoo fedhe nafsee hundaaf qajeelcha ni kennaat ture. Garuu ilmaan namaatiif amaloota kanniin kennuun iddo qormaataa isaan kaa'e. Amaloonni kunniin: fedhii, sammuu ittiin waa hubatuu fi dandeettidha. Iddoon qormaataa addunyaa tana. Namni fedhii ofitiin karaa qajeelinnaa ykn jallinnaa filachuu danda'a. Garuu dhumarratti bu'aa filannoo isaa ni argata. Namni karaa qajeelaa filachuun waan gaarii hojjate, Rabbiin subhaanahu isa gargaaruun Jannata isa seensisa. Namni karaa jallinnaa filatee hanga du'aatti karaa qajeelaatti deebi'u dide immoo gahuumsi isaa ibidda Jahannam ta'a. Kanaafu, addunyaa qormaataa tana keessatti namoonni filannoo ofiitiin bakka lamatti qoodamanii jechuudha: 1ffaa-mu'mina karaa qajeelaa filatee Gooftaa isaatifi ajajamu, 2ffaa-Kaafira karaa jallinnaa filatee Gooftaa isaa faallessu. Rabbiin osoo fedhee namoota hundaa ni qajeelchaa ture. Garuu Inni kana hin feene. Inni hundarra beeka, wanta hojjatuuf hin gaafatamu.

وَلَوْ شِئْنَا لَا يَنْأَا كُلَّ نَفْسٍ هُدًى لَهَا وَلَكِنْ حَقَّ الْقَوْلِ مِنِي لَأَمْلَأَنَّ
جَهَنَّمَ مِنْ أَلْجِنَّةٍ وَالنَّاسُ أَجْمَعِينَ



“Osoo feene silaa nafsee hundaaf qajeelcha ishii ni kenninaafi turre. Garuu Ana irraa jechi “Jinnii fi namoota irraa [kaafirota kan ta'an] hunda Jahannamiin Nan guuta” jedhu mirkanaa'e.” Suuratu As-Sajdah 32:13

“Osoo feene silaa nafsee hundaaf qajeelcha ishii ni kenninaafi turre.” Kana jechuun osoo feene namoota hundaa ni qajeelchinaa turre. Kana aayah biraatin haala kanaan ibsuun ni danda'ama:

﴿وَلَوْ شَاءَ رَبُّكَ لَأَمَنَ مَنِ فِي الْأَرْضِ كُلُّهُمْ جَمِيعًا﴾

“Gooftaan kee osoo fedhee, silaa kan dachii irra jiran hundi isaanitu ni amanuu turan.” Suuratu Yuunus 10:99

Rabbiin subhaanahu wa ta'alaa namoota hundaa qajeelchun ummata tokko ni godhaa ture. Garuu sababa baay'eef kana hin goone. Malaaykonni hundi isaanitu kan qajeelaniidha. Uumamaanu isaan Rabbii olta'aaf ni ajajamu, gonkumaa Isa hin faallessan. Silaa Rabbiin osoo fedhe ilma namaas akka malaaykota gochuu ni danda'a. Garuu ilmaan namaa qormaataf addunyaa keessa waan kaa'ef, kana hin feene. Qormaata booda namni addaan bafaamuun takcaa gara Jannataa takcaa immoo gara Jahannam deemu. Osoo namoonni hundi tawhiida irratti tokko ta'anii silaa mu'minaa fi kaafirri adda ni bahaa?

Lakki. Addaan hin baafaman, hundi isaanitu tokko ta'uu turan. Ossoo namoonni qajeelinna irratti tokko ta'anii waan gaaritti ajajuun, waan badaa irraa dhoowwuu fi jihaanni (qabsoon) ni dhabamaa ture.

Wanti barbaachisaan: Rabbiin namoota gosa lama (kaafiraa fi mu'mina) gochuu keessa hikmaa baay'eetu jira.

“Garuu Ana irraa jechi ‘Jinnii fi namoota irraa [kaafirota kan ta'an] hunda Jahannamiin Nan guuta’ jedhu mirkanaa’e.”

Kana jechuun sababa isaan qajeelinna dhiisanii jallinna filataniif, Ana irraa jechi “Jinnii fi namoota irraa kaafirota hunda Jahannamiin Nan guuta” jedhu mirkanaa'e jira.[\[1\]](#)

Namoonni fi jinniin addunyaa keessatti iddo qormataa waan kaa'amaniif kan fedhe karaa qajeelaa filata, kan fedhe immoo karaa jallinnaa filata. Kuni akka barattoota daree qormataa keessa kaa'amaniiti. Barataan fedhe filannoo isaaf kennname keessaa deebii sirrii filata. Barataan biraam immoo deebii dogongoraa filata. Namoonnis addunyaa tana keessatti akkanuma. Namoonni karaa qajeelaa filatanii irra deeman dhumti isaanii Jannata. Namoonni karaa jallinnaa filatanii jallinna irratti du'an dhumti isaanii adabbii Jahannami. Kanaafi, Guyyaa Qiyaamaaakkana isaaniin jedhama:

فَذُوقُوا مَا نَسِيْتُمْ لِقَاءَ يَوْمٍ مُّكْبُرٍ هَذَا إِنَّا نَسِيْتَ كُمْ وَذُوقُوا
عَذَابَ الْخُلُدِ بِمَا كُنْتُمْ تَعْمَلُونَ

١٤

“Qunnamti Guyyaa keessan kanaa waan dagattaniif [adabbii] dhandhamaa. Dhugumatti Nutis isin daganna. Wanta hojjataa turtaniif adabbii yeroo hundaa turu dhandhamaa.” Suuratu As-Sajdah 32:14

Kana jechuun sababa Guyyaa keessan kana (Qiyaamaa) qunnamuuf amanuu fi hojjachuu dhiistaniif, adabbii dhandhamaa. Aayah keessatti, dagachuun jechuun dhiisu fi irraa garagaluudha. **“Dhugumatti Nutis isin daganna.”** Kana jechuun akkuma isin Guyyaa Qiyaamaatti amanuu fi isa qunnamuuf hojjachuu dhiistan, Nutis adabbii keessatti isin dhiifna. “Al-Jazaa'u min jiinsil amal (jazaan gosa hojiitini).” Jedhamaa miti ree? Rabbiin subhaanahu wa ta'alaa homaayyu hin dagatu. Garuu asitti dagachuun dhiisu akka ta'e haa hubatamu.[\[2\]](#) Kuni lugaa keessattu ni beekkama. Ati jechi nama tokko erga si mufachiisee ykn si aarse booda yoo aarin sirraa gale, “Ani wanta san dagadhe.” Jetta. Kana jechuun dhiise, irraa garagale.

“Wanta hojjataa turtaniif adabbii yeroo hundaa turu dhandhamaa.” Kana jechuun sababa wanta addunyaa keessatti hojjataa turtaniif adabbii turaa addaan hin cinne dhandhama. Wanti isaan hojjataa turan Rabbi olta'aatti amanuu dhiisuu (kafaru), haqa Isarraa dhufe kijibsiisuu, Isaaf ajajamuu diduu fi badii adda addaati.

[\[1\]](#) Tafsiir Sa'dii-768, Tafsiir Muyassar-416, Tafsiiru Qur'aanil Kariim-Suuratu As-Sajdah, Ibn

Useymiin- fuula 69

[2] Maddoota olii

Date Created

November 10, 2020

Author

admin